

Perdagangan borong dan runcit tumbuh 6.7 peratus

PETALING JAYA: Perdagangan borong dan runcit Malaysia merekodkan pertumbuhan jualan sebanyak 6.7 peratus kepada RM142.5 bilion pada Ogos 2023, lapor Jabatan Perangkaan Malaysia (DOSM).

Menurut Ketua Perangkawan, Datuk Seri Dr. Mohd. uzir Mahidin, peningkatan disumbangkan oleh subsektor Perdagangan Borong yang meningkat 6.2 peratus atau RM3.7 bilion kepada RM63.9 bilion.

Kata beliau, perdagangan runcit juga berkembang sebanyak 6.3 peratus atau RM3.6 bilion kepada RM60.5 bilion, diikuti kenderaan bermotor yang meningkat 9.7 peratus atau RM1.6 bilion kepada RM18.1 bilion.

Sementara itu, katanya, peningkatan 2.0 peratus atau RM2.8 bilion berbanding bulan sebelum, disumbangkan oleh Kenderaan Bermotor dengan kenaikan sebanyak RM1.2 bilion atau 7.1 peratus.

Dalam tempoh yang sama, kata beliau, Perdagangan Runcit mencatatkan pertumbuhan positif sebanyak 1.4 peratus atau RM0.9 bilion, manakala Perdagangan Borong bertumbuh 1.2 peratus atau RM0.8 bilion berbanding bulan lepas.

“Pertumbuhan 6.2 peratus

tahun ke tahun dalam subsektor Perdagangan Borong disumbangkan oleh Lain-lain Pengkhususan Jualan Borong yang meningkat RM1.5 bilion atau 6.2 peratus kepada RM25.0 bilion.

“Ini diikuti oleh Jualan Borong Makanan, Minuman & Tembakau (8.1 peratus), Jualan Borong Barangan Isi Rumah (5.4 peratus), Jual Borong Bahan Mentah Pertanian & Haiwan Hidup (7.9 peratus), Perdagangan Borong Tanpa Pengkhususan (6.3 peratus), Jual Borong Berdasarkan Kontrak atau Yuran (10.3 peratus) dan Jualan Borong Jentera, Peralatan & Bekalan (1.0 peratus).

“Bagi perbandingan bulanan, Perdagangan Borong naik 1.2 peratus, terutamanya disumbangkan oleh Lain-lain Pengkhususan Jualan Borong (1.8 peratus), Jual Borong Barangan Isi Rumah (2.2 peratus) dan Jualan Borong Jentera, Peralatan & Bekalan (1.1 peratus),” jelas beliau.

Mengenai subsektor Perdagangan Runcit, Mohd. Uzir berkata, kenaikan 6.3 peratus tahun ke tahun pada bulan dikaji disokong oleh Jualan Runcit di Kedai Bukan Pengkhususan yang meningkat 9.2 peratus atau RM1.9 bilion kepada RM23.0 bilion.